

nantur. Est & *Dervventio*, *Cokarus*, *Olenus*, sive *Elenus*, *Eiden* atque alii, piscibus abundantes. Ad hæc Oceanus, qui ad litus alliditur, Piscium optimorum examina alit, & negligentiam accolis quasi exprobrat, quod minus gnaviter piscaturam exerceant. Montes hic conferti Metallis gravidi, inter quos montes *Dervventfels* vocari, in quibus ad *Nevvlands* æris venæ opulētæ non sine auro & argēto nostro tempore sunt repertæ. Hic etiam invenitur terra illa metallica, sive saxum induratum & micans, Anglis *Blacke leade* dictum, quo ad ducendas lineas, & monochromata pictores utuntur. Superiorem hujus regionis partem intersecat, qui nullo modo racendus est, *Murus* ille celeberrimus, Romanæ provinciæ limes sive clusura, cxxxi millium passuum longitudine, Severi opus: qui ut ait Orosius *partem Insula a cæteris indomitis gentibus vallo distinguendam curavit*. Eum Beda 8 pedes latum, & duodecim altum fuisse scribit, recta ab Ortum in Occasum linea: cujus non solū vestigia sed etiam fragmenta in lōga spatia porrecta & tantū pinnis nudata extant, hodieque conspiciuntur, ut testatur Cædenus. Superest in hac tabula Episcopatus Dunelmensis, vulgo *the Bishoprick of Durham*, sive *Duresme*, qui Eboracensibus ad Septemtrionem confinis in trianguli speciem efformatur, cujus apex ad Occasum coeuntibus ibi Septemtrionali limite & *Tesis* fontibus figuratur. Latus quod Meridiem spectat, continuo Tesis decursu terminatur: alterum, quod Boream, primum brevi ab apice linea ad *Dervventum* flumē, inde *Dervvento* ipso, & *Tina* flu. cum *Dervventum* admiserit, describitur. Basim vero trianguli, quæ Ortum respicit, ora maritimā affingit, quam magno fremitu Oceanus Germanicus gravissime pulsatur. Qua in apicem coarctatur, campi sūt nudī, silvæ raræ, colles glabri, sed non sine ferri venis, convalles autem satis graminosæ: Angliæ enim Apenninus hunc angulum intersecat. Ad Orientalem autem partem, sive trianguli basim, uti etiam ad latera, culturæ terra est perquam grata, redditusque cum agricolarum labore contendunt, pratis, pascuis, arvis distincta, & carbonē fossili quo pro ignis alimento passim in Angliā utuntur, copiosa. Primaria hujus regionis urbs Saxonibus *Dun-* *holm*, Latinus *Danelmum* dicta, vulgus *Durham* corruptissime vocat. Situ quidem æditiori & sanè munitissimo, spatio tamen non magno, ovali quodammodo forma, flumine ab omni parte nisi a Septemtrione circumfunditur & mœnibus armatur. Ad Australem partem fere qua flumen se reducit, Cathedralis Ecclesia surgit, pyramidibus & alta turre conspicua, in medio eminenti tumulo imponitur castrum quodammodo intermediū inter duos pontes è saxo, quibus *Vedra* fluvius hinc ad Ortum, illinc ad Occasum conjungitur; a castro ad Septemtriones patet forum & S. Nicolai cernitur templum. Sunt hic præterea opida, *Standrope*, *Derlington*, *Hartlepole*, *Binchester* & *Chester upon the streete*, cum multis vicis atque arcibus. Numerantur in hoc agro & Northumbria, Ecclesiæ parochiales 118 præter sacella plurima. Flumina hic sunt primum *Tees* Latinis *Teisis* & *Teisa*, Polydoro *Athesis*, Ptolemæo *Tuesis* appellari videtur Camdeno, apud quem librariorum incuria exulare existimat. Hic Fluvius è saxeto illo *Stanemore* erumpens, raptisque secum multis undique torrentibus, per rupes fluens è quibus ad *Egleston* marmora ceduntur, ac deinde multa loca alluens, tandem amplo ostio in Oceanum se ejicit, unde trianguli basis ad oram martimam inchoatur. Item *Vedra*, *Gaunlesse*, *Dervventum*. Atque hæc de hisce tribus partibus dicta sufficient, ad reliquas pergimus.

Montes

Murus Picticus

Episcopatus Dunelmensis.

Situs.

Soli qualitas

Urbes sive opida

Flumina